

BOSNA I HERCEGOVINA
Federacija Bosne i Hercegovine
Tuzlanski kanton
GRAD GRAČANICA
GRADSKO VIJEĆE

Broj predmeta:

Broj akta:

Gračanica, . godine

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09) i člana 16. Statuta Grada Gračanica u skladu sa Zakonom o Gradu Gračanica («Službeni glasnik Grada Gračanica», broj: 1/19), Gradsko vijeće Grada Gračanica na sjednici održanoj dana . godine, d o n o s i

ODLUKU O PRIZNANJIMA GRADA GRAČANICA

Član 1.

Ovom Odlukom utvrđuju se priznanja Grada Gračanica, način i postupak za njihovo dodjeljivanje.

I - VRSTE JAVNIH PRIZNANJA I KRITERIJI ZA DODJELU

Član 2.

(1) Javna priznanja Grada Gračanica su:

1. Zlatna plaketa Grada Gračanica
2. Zlatna značka Grada Gračanica
3. Posebno Gradsko priznanje Počasni građanin Grada Gračanica

(2) Priznanja Grada iz stava 1. ovog člana u svom likovnom i tematskom umjetničkom rješenju obavezno sadrže grb Grada Gračanica sa ispisanim imenom dobitnika priznanja.

(3) Priznanja Grada Zlatna plaketa Grada Gračanica i Posebno gradsko priznanje Počasni građanin dodjeljuju se u obliku plakete, a priznanje Zlatna značka u obliku plakete uz novčanu nagradu čiju visinu utvrđuje gradonačelnik, na početku svake budžetske godine.

1. ZLATNA PLAKETA, ZLATNA ZNAČKA GRADA GRAČANICA

Član 3.

(Subjekti dodjele)

Priznanja Grada ZLATNA PLAKETA dodjeljuje se pravnim licima, a ZLATNA ZNAČKA dodjeljuje se pojedincima, koji su svojim dosadašnjim djelovanjem doprinijeli prosperitetu Grada Gračanica.

Član 4.

(Kriteriji za dodjelu)

(1) Priznanja ZLATNA PLAKETA i ZLATNA ZNAČKA se dodjeljuju prema slijedećim kriterijima:

a) PRAVNIM LICIMA koji su:

- ostvaruju kontinuiran napredak u svome poslovanju
- redovno investiraju u proizvodnju i proširuju proizvodne kapacitete
- postigli značajne rezultate u oblasti privrede, nauke, kulture, sporta, obrazovanja, zdravstva, bezbjednosti, socijalne zaštite, a posebno razvoju i promociji humanitarnog rada i društvene odgovornosti, razvoju komunalne infrastrukture, zaštiti radne i prirodne sredine, razvoju

volonterizma, razvoju dobrih međuljudskih odnosa i sličnih oblasti, koje je imalo odraza za razvoj društvene zajednice

- dali izuzetan doprinos u ostvarivanju prava građana;
- doprinijeli poboljšanju uslova rada i života u MZ na području grada Gračanica;
- za postignuti kreativan rad posebno kod djece i omladine;
- dali izuzetan doprinos u edukativnom i preventivnom djelovanju za slučaj kriznih situacija, te u otklanjanju elementarnih nepogoda koje eventualno zadese društvenu zajednicu.

Za postignute izuzetne rezultate u oblasti komunalne infrastrukture posebno će se uzeti u obzir ocjene i mišljenje mjesne zajednice.

b) pojedincima koji su:

- za inovacije ili za postignuti izuzetan kreativan rad dobili međunarodna priznanja
- učestvovali u spašavanju života, zdravlja i materijalnih dobara od elementarnih nepogoda i drugih nesreća;
- kao donatori humano postupali prema pojedincima ili kolektivima;
- posebno doprinijeli razvoju lokalne samouprave u MZ, gradu i poboljšanju uslova života građana;
- uspješno organizovali organe MZ i udruženja, te doprinijeli njihovom radu;
- postigli izuzetne rezultate u oblasti poljoprivredne proizvodnje;
- ostvarili posebne rezultate u sportu, vaspitno-obrazovnom radu, naučnom radu, umjetnosti i kulturi, na međunarodnom, državnom i federalnom nivou;
- dali izuzetan doprinos u drugim područjima života i rada.

(2) Pored kriterija iz ove Odluke predlagači se mogu koristiti i drugim kriterijima o kojima će dati obrazloženje uz prijedlog kandidata za priznanja (učesće i doprinos koji su dali u odbrambeno-oslobodilačkom ratu, doprinos u organizaciji života i rada građana u ratnim uslovima, itd.).

2. POČASNI GRAĐANIN GRADA

Član 5.

(Počasni građanin Grada)

(1) Priznanje Počasni građanin, dodjeljuje se građaninu BiH koji nije istovremeno i građanin Grada Gračanica, ili građaninu druge države koji se svojim angažovanjem zalaže za dobrobit i prosperitet u svim sferama života i koji doprinosi ugledu grada Gračanica.

(2) Proglašenje počasnim građaninom znak je počasti i ne daje nikakva posebna prava.

Član 6.

Komisija može predložiti u toku jedne kalendarske godine najviše:

- dvije zlatne plakete,
- tri zlatne značke,
- dva posebna priznanja Počasni građanin grada Gračanica.

Član 7.

(Zabrana i ograničenja dodjele)

(1) Priznanja Grada Gračanica ne mogu se dodijeliti vijećnicima Gradskog vijeća i članovima Komisije za propise i Statut, izbor i imenovanje, gradska priznanja i obilježavanje značajnih događaja za vrijeme trajanja njihovih mandata.

(2) Gradska priznanja mogu se dodijeliti državnim službenicima i namještenicima zaposlenim u gradskoj upravi samo za doprinos i ostvarene rezultate koje su postigli izvan redovnog obavljanja utvrđenih aktivnosti.

(3) Komisija za propise i Statut, izbor i imenovanje, gradska priznanja i obilježavanje značajnih događaja koja razmatra prijedloge za dodjelu priznanja nema pravo da vrši promjenu predloženog nivoa priznanja u odnosu na dostavljeni prijedlog.

- (4) Gradska priznanja ne mogu se dodjeljivati pojedincima koji su krivično osuđivani ili protiv kojih se vodi krivični postupak
- (5) Priznanje Grada Gračanice istim pravnim licima i pojedincima može biti dodijeljeno samo jedanput.

Član 8.

(Oduzimanje priznanja)

- (1) Priznanja dodijeljena u skladu sa ovom Odlukom mogu se oduzeti.
- (2) Priznanja će se oduzeti ako je nosilac priznanja pravosnažnom sudskom presudom osuđen od Međunarodnog suda ili drugog nadležnog suda za ratne zločine.
- (3) Priznanja se mogu oduzeti i ako je dobitnik pravosnažnom sudskom presudom osuđen za krivična djela protiv: slobode i prava građana, dostojanstva osobe i morala, imovine pravosuđa, službene i druge odgovorne dužnosti i osnova društvenog uređenja i sigurnosti.

Član 9.

(Način i postupak oduzimanja priznanja)

- (1) Oduzimanje priznanja vrši Gradsko vijeće na osnovu prijedloga Komisije za propise i Statut, izbor i imenovanje, gradska priznanja i obilježavanje značajnih događaja i ličnosti.
- (2) Inicijativu za oduzimanje priznanja može podnijeti bilo koji pojedinac ili pravno lice uz dokaze o okolnostima iz člana 11. Ove Odluke.
- (3) O oduzimanju priznanja Gradsko vijeće donosi posebnu Odluku.

II - POSTUPAK ZA DODJELU PRIZNANJA

Član 10.

(Javni oglas)

- (1) Komisija za propise i Statut, izbor i imenovanje, gradska priznanja i obilježavanje značajnih događaja i ličnosti (u daljem tekstu Komisija) dužna je svake godine, a najkasnije do 1. marta tekuće godine objaviti Javni poziv za predlaganje kandidata za dodjelu Priznanja Grada Gračanica.
- (2) Javni poziv iz stava 1. ovog člana objavljuje se putem sredstava javnog informisanja, web stranici Grada Gračanica i Radio Gračanice, oglasnoj ploči Grada i mjesnih zajednica, kao i na drugi primjeren način kojim će se postići veća obavještenost građana o objavljenom Pozivu.
- (3) Javni poziv sadržavati će kriterije za dodjelu, rok i adresu za podnošenje prijedloga.
- (4) Krajnji rok za podnošenje prijave – prijedloga za priznanja ne može biti kraći od 15 dana od dana objave Poziva.

Član 11.

(Podnosioci prijedloga)

- (1) Prijedloge za dodjelu javnih priznanja mogu podnijeti pojedinci, privredni subjekti, ustanove, mjesne zajednice, udruženja i drugi organizacijski oblici i njihova tijela.
- (2) Predlagači iz stava 1. ovog člana, ne mogu podnositi prijedlog za dodjelu javnih priznanja sami za sebe.

Član 12.

(Forma prijedloga)

- (1) Prijedlog za dodjelu javnih priznanja mora biti u pismenoj formi na obrascu koji utvrđuje Komisija sa obrazloženjem u kojem se daju svi relevantni podaci o ispunjavanju kriterija za dodjelu priznanja.
- (2) Uz prijedlog za dodjelu javnih priznanja potrebno je priložiti i odgovarajuću dokumentaciju.
- (3) Ako prijedlog nije podnesen u skladu sa uslovima sadržanim u Javnom oglasu, neće se uzeti u razmatranje.

Član 13.

(Rasvrstavanje prijedloga)

- (1) Po prijemu prijedloga za dodjelu priznanja Komisija za propise i Statut, izbor i imenovanje, gradska priznanja i obilježavanje značajnih događaja (u daljem tekstu Komisija), prije svega odbacuje

prijave koje nisu dostavljene u skladu sa Javnim pozivom za predlaganje kandidata za dodjelu priznanja Grada Gračanica.

(2) Nakon toga, Komisija vrši razvrstavanje prijedloga shodno vrsti priznanja utvrđenih Odlukom.

Član 14.

(Način bodovanja)

(1) Na osnovu prvog razmatranja broja i sadržaja prijava, svaki član Komisije za svako pojedino priznanje vrši tajno bodovanje elemenata koje sadrži priznanje na nepotpisanim glasačkim listićima, tako što dodjeljuje od 1 (jedan) do 5 (pet) bodova za svaki element koji sadrži priznanje i to:

a) Počasni građanin Gračanica, boduje se prema naročitim zaslugama kojima je doprinio napretku Grada Gračanica i njenom razvoju.

b) Zlatna plaketa i zlatna značka boduje se prema stepenu doprinosa u skladu sa kriterijima utvrđenim Odlukom, za kolektive i pojedince.

Član 15.

(Sumiranje rezultata)

(1) Za svako pojedino priznanje predsjednik Komisije sumira ukupan broj bodova, te je konačan izbor kandidata koji ima najveći broj bodova.

(2) Kada se po Odluci dodjeljuje dva ili više istih priznanja, izabrani su kandidati koji po redoslijedu imaju najveći broj bodova.

(3) Ukoliko dva ili više kandidata imaju isti broj bodova, prednost se daje kandidatu slabije zastupljenog spola, kao i kandidatu koji pored ostalih kriterija ima obrazloženo i učešće u odbrani BiH.

(4) Ukoliko nema kandidata koji imaju prednost prelazi se na drugi krug glasanja i to tako što će svaki član Komisije svom favoritu dodijeliti 5 (pet) bodova, a svakom narednom po jedan broj manje.

(5) Po dobijenim rezultatima utvrdit će se konačna lista prijedloga za dodjelu priznanja.

(6) Komisija aklamacijom, tj. javnim glasanjem potvrđuje ovako dobijenu listu i uz izvještaj prosljeđuje Gradskom vijeću Gračanica na usvajanje.

Član 16.

(Utvrdjivanje prijedloga Odluke)

(1) Komisija je dužna u roku od 15 dana od dana isteka roka za podnošenje prijedloga razmotriti sve pristigle prijedloge, izvršiti bodovanje i utvrditi prijedlog Odluke za dodjelu priznanja, te isti dostaviti Gradskom vijeću na razmatranje.

(2) Komisija može, uz valjano obrazloženje, predložiti da se, cijeneći utvrđene kriterije, neko od ustanovljenih priznanja ne dodjeljuje.

(3) Odluku o dodjeli gradskih priznanja donosi Gradsko vijeće na prijedlog Komisije.

Član 17.

(Uručivanje)

(1) Javna priznanja uručuju Predsjedavajući Gradskog vijeća i Gradonačelnik.

(2) Posthumno dodijeljeno javno priznanje uručuje se članovima uže porodice.

(3) Uručenje gradskih priznanja Zlatna plaketa, Zlatna značka i Počasni građanin/ka Grada Gračanica vrši se na Svečanoj sjednici Gradskog vijeća u povodu dana Grada – 2. juna.

III - ZAVRŠNE ODREDBE

Član 18.

Gramatička terminologija korištenja muškog spola u ovoj Odluci i Odlukama o dodjeli priznanja donesenim na osnovu ove Odluke, podrazumijeva uključivanje oba spola.

Član 19.

- (1) Stručne i administrativno-tehničke poslove u vezi sa dodjelom javnih priznanja obavljat će se u Službi za poslove Gradonačelnika i Gradskog vijeća.
- (2) Služba je dužna da vodi evidenciju o dodijeljenim gradskim priznanjima.

Član 20.

Stupanjem na snagu ove Odluke prestaje da važi Odluka o općinskim priznanjima («Službeni glasnik Općine Gračanica», broj: 2/08, 3/11, 03/16 i 03/18).

Član 21.

Odluka stupa na snagu danom objavljivanja u «Službenom glasniku Grada Gračanica».

PREDSJEDAVAJUĆI
GRADSKOG VIJEĆA
Mirzet Topčagić

OBRAZLOŽENJE

PRAVNI OSNOV

Pravni osnov za donošenje Odluke je:

- Član 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09) kojim je propisana nadležnost Gradskog vijeća za donošenje odluke o nagradama i priznanjima jedinice lokalne samouprave

RAZLOZI DONOŠENJA

Programom rada Gradskog vijeća za 2023. godinu predviđeno je donošenje Odluke o priznanjima Grada Gračanica.

Nova Odluka o priznanjima treba se donijeti prije svega kako bi se ista prilagodila promjeni statusa Grada Gračanica, iz Općine u Grad.

Takođe, u toku primjene važeće odluke pojavila se potreba za odvajanjem priznanja po osnovu kriterija, te uspostavljanje posebnog priznanja za učešće u odbrani Gračanice.

Kod izrade Odluke uzete su u obzir sve okolnosti i nedoumice koje su se dešavale u toku primjene važeće odluke (kriteriji, prijedlozi, broj priznanja, oduzimanje priznanja i sl.)

TOK JAVNE RASPRAVE

Gradsko vijeće Grada Gračanica je na sjednici održanoj 31.01.2023. godine usvojilo Nacrt Odluke o priznanjima te isti stavilo na javnu raspravu u periodu od 30 dana. U Zaključku je Gradsko vijeće obavezalo Službu da obavezno u javnu raspravu uključi mjesne zajednice i boračka udruženja s područja Grada Gračanica.

Služba za poslove Gradonačelnika i Gradskog vijeća u skladu s sačinjenim Programom javne rasprave javnu raspravu provela je na sljedeći način: Postavljanjem javnog poziva na zvaničnu web stranicu Grada Gračanica www.gracanica.gov.ba na linku e-rasprave gdje su sva zainteresovana lica moći poslati primjedbe i sugestije putem online forme, objavom obavještenja putem Radio Gračanice, dostavljanjem pismenog obavještenja o provođenju javne rasprave o nacrtu Odluke svim svim Vijećima mjesnih zajednica i boračkim organizacijama i udruženjima, organizovanjem posebnog sastanka s predstavnicima boračkih organizacija i udruženja i održavanjem otvorenog sastanka – glavne javne rasprave za sva zainteresovana lica (na koji su posebno bili pozvani: javne ustanove i javna preduzeća, mjesne zajednice u i boračke organizacije i udruženje.

Javna rasprava je trajala 30 dana i završila se 03.03.2023. godine.

Javne konsultacije s Koordinacijom boračkih udruženja održan je 13.02.2023. godine u prostorijama ORVI, na kojem su prisustvovali predstavnici svih udruženja Koordinacije. Na zajedničkom sastanku zaključeno je da se ne odvajaju nagrade za doprinos u odbrani BiH, obzirom da je nemoguće utvrditi objektivne kriterije doprinosa, posebno imajući u vidu šehida/pale borce koji su izgubili života, pa onda ratne vojne invalide itd. Prijedlog iznesen na javnim konsultacijama je da ostanu nagrade i priznanja kao i do sada, s time da se uvede sistem bodovanja od strane Komisije, a da se kao dodatni kriterij u vidu davanja prednosti predvidi kriterij učešća i doprinosa u odbrani BiH.

Uvaženi su Zaključci Koordinacije te je u prijedlogu Odluke izostala posebna nagrada Zlatna plaketa odbrane, i predviđen je dodatni kriterij i prednost za učesnike u odbrani grada.

Otvoreni sastanak s zainteresovanim građanima održan je 03.03.2023. godine na kojem su bili prisutni Zijad Kapetanović (ORVI), Danica, Martić, Najfa Beganović (ispred MZ Gračanica), Halilović Ferida (Organizacija PŠ/PB), vijećnik Edin Šehić, Predsjedavajući Gradskog vijeća, predstavnici Gradskih službi.

Na raspravi su istaknuti prijedlozi da se ne odvajaju posebno nagrade za odbranu, već da se iste uvedu kao dodatni (pomoćni) kriterij kod bodovanja u smislu davanja prednosti uz ispunjavanje posebnih kriterija. Takođe, na raspravi je istaknuto da se svakako mora uvesti sistem bodovanja kod odlučivanja Komisije.

Primjedbe sa rasprave su prihvaćene i ugrađene u odredbe Prijedloga

U toku javne rasprave pristigle su sljedeće primjedbe i sugestije:

- Građanka Larisa Šuša putem sistema e-rasprave koja je predložila da se i ove i svake godine doda posthumna dodjela zlatnih znački uzornim građanima, te je dala i prijedlog za Zlatnu plaketu što nije bilo predmet ove javne rasprave. – Primjedba nije prihvaćena jer se ne mogu unaprijed odrediti posthumna priznanja svake godine. I Nacrtom i Prijedlogom odluke je omogućeno posthumno priznanje, ali se ne može unaprijed predvidjeti da se svake godine dodjeljuju.
- Pismena primjedba i sugestija Ibrahima Nurkića, Omera Hamzića i Amira Zejnilagića da se predvidi najviše društveno priznanje Grada Gračanica „Nagrada za životno djelo“, koja bi se dodjeljivala povremeno, na prijedlog posebne Komisije i posebnog konkursa. – primjedba nije prihvaćena obzirom da traži značajna odstupanja od postojeće Odluke, a kriteriji su skoro pa isti kao i kod zlatne značke.
- Primjedbe GO Naše stranke:
 - ❖ da se brišu priznanja povodom dana Odbrane, **primjedba uvažena s javnih rasprava.**
 - ❖ Prijedlozi izmjene postojeći kriterija koji su uvaženi i ugrađeni u Prijedlog:
 - ❖ ostvarili izuzetne rezultate u poslovanju, u odnosu na prethodnu godinu; (primjedba Naše stranke: *ostvaruju kontinuiran napredak u svome poslovanju - prihvaćena*)
 - ❖ investirali u proizvodnju, proširili proizvodni kapacitet i uposlili veći broj radnika u odnosu na prethodnu godinu (primjedba Naše stranke: *redovno investiraju u proizvodnju i proširuju proizvodne kapacitete - prihvaćena*)
 - ❖ dali izuzetan doprinos “u edukativnom i preventivnom djelovanju za slučaj kriznih situacija, te u otklanjanju elementarnih nepogoda koje eventualno zadese društvenu zajednicu. (primjedba Naše stranke **prihvaćena i ugrađena**)
 - ❖ da se u članu 4. u pretposljednjoj rečenici doda sljedeći tekst :”(učešće i doprinos koji su dali u odbrambeno-oslobodilačkom ratu, doprinos u organizaciji života i rada građana u ratnim uslovima, itd.)” – **prihvaćena i ugrađena**
 - ❖ U članu 4. tekst:” Za postignute izuzetne rezultate u oblasti komunalne infrastrukture posebno će se uzeti u obzir ocjene i mišljenje mjesne zajednice” briše. **Primjedba nije prihvaćena** iz razloga što je potreban dokaz za ulaganje u komunalnu infrastrukturu koji predlagač priznanja mora dokazati.
 - ❖ U članu 4. brisati poslednju rečenicu. – **prihvaćeno i ugrađeno**, međutim nije prihvaćeno obrazloženje da Komisija sama odredi sistem bodovanja, obzirom da je u toku javne rasprave isticana potreba uvođenja pravila za bodovanje po kojima bi Komisija radila.
 - ❖ Da se dodjeljuje jedna zlatna plaketa, jedna zlatna značka i počasni građanin svake treće godine, **primjedba nije usvojena**, predlagač smatra da o tome odluku treba donijeti Gradsko vijeće eventualno putem amandmana.

OBRAZLOŽENJE PREDLOŽENIH IZMJENA

Članom 1. Prijedloga Odluke definisan je predmet Odluke.

Članom 2. Definisane su vrste priznanja Grada Gračanice, koje su ostale iste kao u odluci na snazi. U stavu 3. Ovog člana utvrđena je forma priznanja u vidu plakete i predviđena je novčana nagrada za dobitnike zlatnih znački. Ovim se odstupa od ranijih formi dodjela u vidu zlatnih pločivca, obzirom da je Služba utvrdila da niti jedna općina, grad niti institucija ne dodjeljuje nagrade na ovaj način, te da se uglavnom dodjeljuju nagrade u vidu plaketa (simbolično) i za fizička lica u vidu novčanog iznosa. Novčani iznos predviđeno je da određuje Gradonačelnik u skladu s usvojenim Budžetom. (ukoliko bi se odredio tačan iznos u Odluci kod inflacije bi bilo potrebno svaki puta mijenjati odluku, a ukoliko se ista veže za npr. Prosječnu plaću dobio bi se iznos koji ne bi bio okrugal možda bi imao i decimalu i sl.)

Članom 3. I 4. definisani su subjekti i kriteriji za dodjelu priznanja zlatna značka i zlatna plaketa. Ponuđenim rješenjem definisano su jasnije subjekti koji mogu dobiti priznanje gdje je jasno definisano da su subjekti PRAVNA i fizička lica(pojedinaac). U dosadašnjoj praksi pokazala se potreba jasnije definisanja riječi *kolektiv*. Kriteriji za dodjelu uglavnom su ostali isti kao i ranije obzirom izuzev izmjena koje su prihvaćene u toku javne rasprave.

Članom 5. Odluke definisano je ko može dobiti priznanje Počasni građanin/ka Grada Gračanica gdje je ostavljeno rješenje iz važeće Odluke.

Članom 6. Utvrđen je broj priznanja koja se dodjeljuju u povodu dana Grada koja se mogu dodijeliti u toku jedne kalendarske godine s tim da je definisan maksimalan broj posebnih priznanja Počasni građanin/ka Grada Gračanica

Članom 7. Propisane su zabrane i ograničenja prilikom dodjele. Zabrana dodjele Gradskim vijećnicima i članovima Komisije bila je određena i važećom odlukom, ograničenja su ostala takođe ista, samo su definisana ograničenja u pogledu državnih službenika i namještenika

Članom 8. I 9. Određena je mogućnost donošenja Odluke o oduzimanju priznanja, obzirom da se u dosadašnjoj praksi kod drugih lokalnih zajednica pokazalo da su dobitnici priznanja kasnije postali nedostojni istog.

Članom. 10.Određena je obaveza objave Javnog poziva za predlaganja kandidata s jasno definisanim rokovima i načinom predlaganja.

Članom. 11. Određeno je ko može podnijeti prijedlog za priznanje, te utvrđena zabrana predlaganja „samog sebe“.

Članom. 12. Utvrđena je forma prijedloga, te je određeno da prijedlog mora doći u pismenoj formi na propisanom obrascu.

Članom 13-16 Definisan je način rada nadležne Komisije i predlaganja Odluke. Značajna novina u odnosu na dosadašnje rješenje je da Komisija odmah predlaže Prijedlog Odluke Gradskom vijeću. Naime u dosadašnjoj praksi Komisija je predlagala Nacrt odluke koji nije išao u klasičnu javnu raspravu nego je data mogućnost podnošenja primjedbi i sugestija vijećnicima i Klubovima vijećnika što je u suprotnosti s usvojenom Odlukom o javnim raspravama. Naime ukoliko bi se utvrdilo da se prije svega donosi Nacrt, on bi se morao staviti na otvorenu javnu raspravu u kojoj imaju pravo učestvovati svi građani. Opredjeljenje da se odmah predlaže Prijedlog Odluke nalazi se i u činjenici da je donošenjem Nacrta a zatim i Prijedloga odluke dolazilo do nepotrebnog kompromitovanja i licitiranja s predloženim kandidatima za priznanja te se nerijetko dešavalo da pojedinci ne žele da budu predloženi za priznanja. Vijećnicima, klubovima kao i Gradonačelniku i dalje stoji na raspolaganju mogućnost podnošenja amandmana na Odluku ukoliko smatraju da se priznanja trebaju dodijeliti nekom drugom kandidatu.

Ovdje je potrebno i napomenuti da je određen način predlaganja kandidata od strane Komisije i uveden sistem bodovanja, kao i utvrđeno davanje prednosti kod jednakog broja bodova za doprinos u odbrani ali i uvažena je primjedba Komisije za ravnopravnost spolova i uvedena obaveza davanja prednosti slabije zastupljenom spolu. Prijedlogom odluke utvrđeno je da Komisija prijedlog potvrđuje aklamacijom, odnosno da se ne može desiti da kad se utvrde bodovi nema većina u Komisiji da se utvrdi prijedlog.

Članom 17. Određen je način i termin uručivanja priznanja.

U završnim odredbama (članovi 18-21) definisano je da stručne i administrativne poslove u vezi dodjele priznanja obavlja Služba za poslove Gradonačelnika i Gradskog vijeća, koja je obavezna i da vodi službenu evidenciju o dodjeljenim prizanjima, prestanak važenja dosadašnje Odluke kao i stupanje na snagu Odluke. Takođe, članom 18. predviđeno je korištenje rodno osjetljivog jezika u Odluci.